



29. oktober 2020  
Atassut

UKA 2020/132  
Aqqalu C. Jerimiassen

**Kinguaassiutitigut atonerluisimasut pineqaatissinneqarnerannut atatillugu, kinguaassiuutitigut atonerlueqqinnissaq pinngitsoorniarlugu katsorsarneqartalernissaat siunertarlugu nunatsinni pinerluttulerinermut inatsisipallannguutissaaniksaqqummiussisoqarsinnaaqullugu Naalagaaffeqatigiinnermi oqartussaasut saaffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq StineEgede, Inuit Ataqatigiit)

Inuk ikioqqusoq saaffiginnittarpoq, imaluunniit pissusilersuutimigut takutitsisarpoq malugequlluni ajortuuppat ajunngitsuuppalluunniit.

Kinguaassiutitigut atonerluineq qaqagumulluunniit akuerineqanngisaannassaaq, meerannguaq minguitsoq sumilluunniit sussuteqanngitsoq tarninga iperterneqartarpoq inuunermi sinnera pigisasaanik kinguaassiutitigut atonerlunneqarsimatilluni. Meeraq tassaavoq tamani sumiluunniit pingaarnerpaasoq nunatsinni paarilluangassarput. Meeraanittami suna tamaat siunissarput qanoq ittuusinnaanersoq ilusilertarmangu, sunalu siunnerfik soqutigisarlu piginerippat.

Atonerluisuusoq atonerluisuuvoq, iliuusaalu akuersarneqanngilluinnassaaq, akuerineqanngisaannavissussallunilu. Taamaattorli, puigussannangassarput ataaseq tassaavoq, aamma taanna inuummat, qanorluunniit ajortigisumik iliuuseqarsimangaluarni sulii uattut ilittullu inuunnaavoq, piliaali ajorluinnarpoq. Inuk inuunerata sinnera qanoq ittuunissaanik naqissusereersinnaanngilarput, nalunngilarput iliuusaa akuersarneqarsinnaanngilluinnartoq. Taannali taamak iliortoq paasisinnaasariaqarparput katsorsartinneqatigut SUNA aallaavingalugu taamannak pissusilersorsimanersoq akueriuminaatsigisumik.

Inuttut namminiussutsitsinni naliliisinnaaserput malillugu, ingasammik angajoqqaajusugut akueriuminaatsittaqaarput kamannangaartutullu isigisarlugulu inoqatitta meerannguanut taamak kannguttaatsigisumik iliorsinnaasarnarat, uagulli eqqartuussisuunngilagut, inatsisit ataani tamatta inuuvugut, imaassanngilaq uagut immitsinnut misigissutsigut malillugit pillaasussanngussasugut taamannak iliuuseqarsimasunut.

Soorunami meeraq kinguaassiutitigut atonerlunneqarsimasoq ikiorneqarnissaa qaqagukkulluunniit salliullugu sullinneqarnissaa pisussaaffigisuaannassavarput inuiaqatigiittut, taamaattuassaarlu. Taamaattoutaarli, kinguaassiutitigut atonerluisimasoq katsorsassallugu pisussaaffeqartariaqarput aninguinermi kingorna taamaalioqqinngilluinnarnissaa piniarlugu, ataasermi piliaq annertuallaareerpoq inuiaqatigiinnullu akisuallaareerpoq, taamannallu iliortoqanngilluinnarnissaa anguniartuaannartariaqarparput pisussaaffigisariaqarlugulu taamaattoqanngilluinnarnissaa.



Atornerluisuusimasut pineqaatissinneqarsimatillugit, tusaamaneqartarpoq isertitsivimmiitillugit qanoq allanik pineqaatissinneqarsimasoqatiminnik pineqartarneri, tassami toqutsisimasuniilluunnit ajornerusumik isertitsivimmi pineqarniartarneri tusaamanartarmat, tassalu isertitsivimmeeqatinit persuttarneqarnerit allallu misigisarsimagaat.

Taamaammat pisussaaffimmik inuiaqatigiittut naalagaaffeqatigiinnerup iluani suliassaqarpugut imaannangitsumik, tassalu siunissaq ungasinnerusoq isigingalugu pitsaanerpaamik meerartatsinnut atungassaqartitsisariaqaratta, isumannaatsuusariaqarpoq nunarput, nunarput pitsaaneruleqqittariaqarpoq. Kinguaassiutitigut atornerluisartut nungutivinneqarniartariaqarput, tamassumallu malitsigisaanittaaq inuiaqatigiittut ammanerusariaqalerpugut, inoqatigut meeqqanut kajungertarnermik ussarnartorsiortartut katsorsarneqarnissamik ikiorneqarsinnaanissaannut aqutissiuussisariaqarluta, pisoqartinnangu inuk qitiutillugu iliuuseqajaarta, imaassanngilarmi aatsaat pisoqareerpat, meeraq minguitsoq aseroreerpat mingutserneqareerpat iliuuseqarniarneq allartillugu. Naamik, naamerluinnaq taamaattoqassanngilaq! Piffissaangallartillugu iliuuseqarniarta, kinguaassiutitigut atornerluisarneq akuerinngilluinnarlutigu maanngaanniik erseqqissumik suaaruteqaqataaniarta.

Taamatut Atassummiik oqaaseqarluta siunnersuut tapersingaarlutigu ataatsimiitsitaliamit suliarineqarnissaanut innersuupparput.